

Kolosi

Nəgkiariien sə rani mə nəfe i nəkukuə

Kolosi in nəkukuə sə ro kahar i Pol rımərai nəpın in ramarə ia kalapus fwe Rom ia nəpın riti ipaka ti nuk 59 uə 60. Epafra revən fwe Rom mını pen ti Pol mə nahatən eikuə me nepwın fwe Kolosi kamhahatən nərmama mə nahatətəien səvənraha ia Kristo rıpkəmwhen mhə. Nahatən eikuə me nəha hamahatən irəha mə tuhəfwaki m nagelo me, mhesi pen natuakəmien me nepwın, mhəsiai mwi nəpın ikinan me nepwın. Pol rırai nəkukuə i revən ti nirəha mə tuhaməkeikei mhərər əknekın, mhəpwəh nətərigien ia nahatən eikuə me nəha. Kristo in rasori ia narimnari me pam. Nemhəien səvəi Kristo in əpa ruvehimıru kitaha ti noien ərəha me səkitaha. Iesu rıfi nari ia kitaha tsəpwəh mwi nisaiien natuakəmien me səvəi iərmama.

¹ Iou Pol, iou aposol riti səvəi Iesu Kristo ti nəri nə mə Kumwesən rıməni nəkwan mə tako, mine piəvtaha Timoti. ² Nəkukuə i rauvehe tukumi-aha nərmama me səvəi Kumwesən fwe taon nəha Kolosi.

Kimiaha nə piəvmaha me hiəməuvehe mho ku-
atia kimiaha Kristo, hiamahatətə pərhiən irə.

Pwəh Kumwesən Tata səkitaha trəriari pehe na-
masanien mine nəmərınuien m kimiaha.

Nəgnəginiien mine nəfwakiien

³ Nəpɪn me pam, nəpɪn kɪmaha iahaməfwaki tukumiaha, iahaməni tanak tɪ Kumwesən i in Tata səvəi Iesu Kristo Iərimənu səkitaha. ⁴ Iahaməni tanak tukwe in tɪ nəri nə mə iahəuvəregi raka mə kɪmiaha hiamahatətə əknekɪn ia Iesu Kristo nənə mamhokeikei pɪk nərmama me səvəi Kumwesən. ⁵ Nahatətəien mɪne nokeikeien səkɪmiaha ro iamɪnhi irə tɪ nəri nə mə hiəukurən amasan ia rerɪmiaha mə Kumwesən truvei pehe nəfe nari sə rɪnəpnəpenə irə m kɪmiaha fwe ia neiai. Hiəuvəregi raka narimnari me nəha ia nəgkiariien pərhiən, in i nəgkiariien amasan səvəi Iesu Kristo. ⁶ Ia kwopun me pam ia təkure tɪprənə nərmama kamhəni irapw nəgkiariien amasan səvəi Kristo, nənə raukuə mamə kwənkwan mauverə mamə amasan nɪmɪruien səvəi nərmama me həpɪk. Rəmwhən a mwɪ ia kɪmiaha nəpɪn hiamregi mhəukurən nɪpərhiənien nəha ia namasanien səvəi Kumwesən, nənə rauverə mwɪ mukuə ia nɪmɪruien səkɪmiaha. ⁷ Epafra rɪnahatən kɪmiaha ia nəgkiariien nəha. In iərmama riti səkɪmaha iahokeikei pɪk in, iahamə tukwɪni pəri nari kɪmaha min. Kɪmaha iahəukurən nətɪgiteien irə, ramasitu ia wok səvəi Kristo maməgkiari tukwɪni səkɪmaha. ⁸ In rɪməni pehe tukumaha i mə nokeikeien səkɪmiaha rasori raku pen tɪ Nənɪmwɪn Ikinan.

⁹ Ro iamɪnhi irə nəpɪn iahəregi nəvisaiuen nəha, nənə iahaməfwaki tukumiaha ia nəpɪn me pam, mamhəres mə kɪmiaha tihəuvehe mhəukurən amasan pam nəkwai Kumwesən ia nukurənien sə raku pen tɪ Nənɪmwɪn səvənhi. ¹⁰ Ro iamɪnhi irə

mine kimiaha tihamarə ia narəien atukwatukw sə ramo lərimənu səkitaha rerin ramagien, mamhəukuə kwənkwamiaha ia noien amasan me pam, nənə ia nəpɪn me nukurəniən səkimiaha truvehə masori mwi hiəukurən amasan mwi Kumwesən. ¹¹ Iahaməfwaki mə niskaiien asori səvəi Kumwesən tro kimiaha hiəskai nəpɪn nərəhaien truvehə, pwəh hiərəer əknekɪn ia nəpɪn me pam, nənə mho nətərigien səkimiaha rəpwəmwis, nənə mamho kimiaha hiamagien ¹² mamhəni tanak ti Tata Kumwesən ti nəri nə mə in rino kimiaha mə hiəukurən nuvehi pəriien nautə kimiaha nərmama ikinan me səvəhi. In rinəmri karen nautə nəha ia kwopun rukuraan ikin. ¹³ Iakani iamɪnhi irə ti nəri nə mə in ripekɪ raka kitaha ia niskaiien səvəi nəpitəvien, mipekɪ pen kitaha ia nitətə sə Tini keikei ramərimənu irə. ¹⁴ Tini rifi nari ia kitaha, mo mə Kumwesən trəpwəh nərpwɪniən noien ərəha me səkitaha.

Kristo in rasori ia narimnari me pam

¹⁵ Tini Kumwesən in rəmwɪhen atukwatukw ia Tata səvəhi sə səpkətɔni mhə. In nəmrɪtaik sə in rasori ia neiəi mine ti prənə mine narimnari me pam. ¹⁶ In rasori ti nəri nə mə in rino pam narimnari me nəha, narimnari me səməme samətɔni mine səməme səpkətɔni mhə, kig me, uə ieni mə, uə nənimwɪn me səməme kamhəuvehi nasoriien mine nərimənuien. Narimnari me pam nəha, Tini Kumwesən rino irəha mə səvəhi. ¹⁷ In riməkupwən marə ia narimnari me pam, nənə narimnari me pam kamharə ti nəri nə mə

1:11: Efes 1:19, 3:16 **1:12:** Efes 1:11,18 **1:13:** Luk 22:53, Efes 2:2 **1:14:** Efes 1:6,7 **1:15:** 2Kor 4:4, Jon 1:18 **1:16:** Jon 1:3,10 **1:17:** Jon 1:1, 8:58

niskaiien səvənhi raməkwtəmhiri irəha. ¹⁸ In ratori ia nakalasia me səvənhi irəha həmwhen ia nīpwran in kənkəpwə. In nukunen, iərmama sə rīməkupwən mətui mwi ia nemhəien səvənhi, ro pen in ramasan ia narimnari me pam mukupwən.

¹⁹ Kumwesən ramarə pam ia rerī Tini mukuər irə. Nənə Kumwesən rerin ragien pwəh ro iamīnhi irə. ²⁰ Rerīn ragien rīpeki narimnari me pam ia təkure tīprənə mīne ia neiāi hənəvisə irəha mīn, muvi sīmwin pehe irəha ia tīni, nənə məmri nəmərīnuīen ia nīten sə rīnāiu ia nei kamarkuāui.

²¹ Fwe kupwən kīmīaha hīamarə isīpwin tī Kumwesən. Hīaməmwəki in tī nəri nə mə rerīmīaha ramrhi ərəha in, nənə mamho noīen ərəha me. ²² Mətə təkwtəkwuni, tī nəri nə mə Tini ruvehe iərmama məmwhen ia kītaha, memhə, ro pen Kumwesən ro kīmīaha hīəuvehe in me nepwin. In ro iamīnhi irə mə trərpwi irapw kīmīaha ia nənīmen hīatukwatukw pam,^a mhəmher, kəpwəh nətonīen noīen ərəha riti səkīmīaha. ²³ Mətə tīhaməkeikei mhəmwur pen ia nahatətəien səkīmīaha, mamhərer əknekīn irə, mhəpwəh nīkiukiuien, mhəpwəh narakaien ia noīen sə hīaməmri pen əknekīn nətərigien səkīmīaha ia nəgkīariien amasan nəha hīəuvəregi raka mīne nəfe rani. Kīnəvisau irapw raka nəgkīariien amasan nəha ia kwopun me ia tīprənə. Iou Pol, iou iərmama riti sə iakamasitu ia wok nəha.

1:18: Efes 1:22-23, Wok Me 26:23, Rev 1:5 **1:19:** Jon 1:16, Kol 2:9 **1:20:** Efes 1:10, 2:16, Rom 5:1, Efes 1:7, 2:13, 1Jon 2:2

1:21: Rom 5:10, Efes 2:12, 4:18 **1:22:** Efes 2:14-16, Efes 5:27
^a **1:22:** Uə “kīmīaha nəkur ikinan me səvənhi.” **1:23:** Efes 3:17, Hip 3:14, Mak 16:15, 1Tim 3:16

Pol ramasitu mamsese ti nakalasia me sǝvǝi Iesu Kristo

²⁴ Tǝkwǝkwuni rerik ragien a mǝ kamo nǝmisǝien miou tukumiaha.^b Ia nǝmisǝien me i iakamregi ia nǝpwǝrak, iakamripin pen a mammo sampam ia nǝmisǝien me sǝvǝi Kristo sǝmǝme in rimǝregi ti nǝpwǝran. Nǝpwǝran nǝ in nǝ nakalasia me sǝvǝnhi. ²⁵ Iou iǝrmama riti sǝ iakamasitu ia nakalasia me nǝha. Kumwesǝn rinǝmri pehe wok i ia rǝgik mǝ takasitu ia kimiaha, mǝvisau irapw pam nǝgkiariien sǝvǝnhi m kimiaha. ²⁶ Nǝgkiariien nǝha in nǝgkiariien riti sǝvǝi Kumwesǝn rinǝrkwafǝ ti nǝrmama fwe kupwǝn, mǝtǝ tǝkwǝkwuni nǝha Kumwesǝn rino pui m nǝrmama me sǝvǝnhi. ²⁷ Kumwesǝn rokeikei mǝ tro nǝrmama me nǝha sǝvǝnhi hǝtoni mhǝukurǝn mǝ nǝgkiariien nǝha in rinǝrkwafǝ i truvei pen nautǝ amasan m nǝrmama ripko mhǝ irǝha nǝkur Isrel. Nautǝ amasan nǝha Kristo ia rerimiahaha, iǝmǝ sǝ hiamǝtigite irǝ truvei pehe nasoriien m kimiaha ia neiai.

²⁸ Kristo nǝha, kimaha iahamǝni irapw in, mamhǝvǝhag m nǝrmama me pam, mamhahatǝn nǝrmama me pam ia nukurǝnien me pam, mǝ irǝha pam tuhǝuvehe mhǝmruǝ ia noien sǝvǝi Kristo, nǝnǝ iahǝrpwi irapw irǝha ia nǝmri Kumwesǝn. ²⁹ Ia noien nǝha iakamǝmwur mamsese tukwe mamesi pen niskaiien asori sǝvǝi Kristo sǝ ramo wok ia nimiruien sǝiou.

1:24: Efes 3:13 **b** **1:24:** Pol ramǝmak fwe ia kalapus nǝpin rirai nǝkukuǝ i. Kalapus nǝha in nǝha nǝmisǝien sǝ Pol ramǝgkiari irǝ ia vas 24. **1:25:** Efes 3:2,7-8 **1:26:** Rom 16:25-26, Efes 3:3-5,9-10
1:27: Efes 1:18, 1Tim 1:1 **1:28:** Efes 4:13 **1:29:** Efes 3:7,20, Fil 4:13

2

¹ Iakokeikei mə tihəukurən mə iou iakamsese pik tukumiaha nəkur Kolosi, mine nəkur Laotisia, mine nakalasia me pam səməme həpkətoni raka mhə nənimek ia nəpın riti. ² Iakokeikei mə takasitu ia nirəha pwəh həregi ramasan fwe ia rerınraha, mhəuvehe mho kuatia mhokeikei irəha me, mhəukurən amasan nıpwrari nəgkiariien pərhien nənə mhəuvehi namasanien me pam səvəi noien i. Ro iamınhi irə irəha tuhəukurən nıpwrari nəgkiariien sə Kumwesən rınərkwafə i fwe kupwən. Nəgkiariien nəha in Kristo, ³ iamə sə Kumwesən rınərkwafə pen nukurənien amasan me pam səvənhi irə. ⁴ Iakaməgkiari iamınhi irə m kimiaha ti nəsisəgien ia nəgkiariien eikuə me səvəi nərmama sə rəsien mavi raka nətərigien səkimiaha. ⁵ Nıpərhienien, nıpwrak rıpkarə mhə kimiaha min, mətə iakamarə kitaha m kimiaha ia nənimwik. Nənə rerik ragien pik ti nəri nə mə iakamətoni mə nətərigien səkimiaha kuatia a, nənə hiamahatətə əknekın ia Kristo.

Nərmama me səvəi Kristo nimiruien səvənraha rıvəuvehe mıvəukuər raka

⁶ Ti nəri nə mə kimiaha hiəməuvehi Iesu Kristo mə in Iərimənu səkimiaha, nənə tihaməkeikei mharə ia narəien kuatia kimiaha min. ⁷ Tihəkwətəmhiri əknekın in rəmwhen ia nuai nei raməkwətəmhiri əknekın tıprənə. Nimiruien səkimiaha traməkeikei mərəer əknekın irə rəmwhen ia nimwə sə ramərəer əknekın ia tıprənə. Nahatətəien səkimiaha traməkeikei

2:2: Efes 3:4,18, Kol 1:26 **2:3:** Aes 45:3, 1Kor 1:24,30, Efes 3:19

2:4: Rom 16:18, Efes 5:6, Kol 2:8 **2:5:** 1Kor 5:3 **2:7:** Efes

3:17, Efes 2:20-22

miskai ia nǝpɪn me pam rǝmwɛn kɪnahatǝn raka kɪmiaha irǝ. Nǝnǝ ia nǝpɪn me pam tihamǝkeikei mhǝni tanak m Kumwesǝn.

⁸ Nǝrmama nǝpɛwɪn nǝha irǝha kamhǝni mǝ hokeikei pɪk nukurǝnien. Mǝtǝ nǝgkiariien sǝvǝnraha ro neikuǝien i, nɪpɛwɪn riwǝn, tɪ nǝri nǝ mǝ ramesi pen a nahatǝnien sǝvǝi nǝrmama mɪne nǝnɪmwɪn me i irǝha nukune noien me sǝvǝi tɪprǝnǝ i. Nǝgkiariien sǝvǝnraha rɪpkesi pen mhǝ nǝvisauien ia Kristo. Tihamǝtui amasan mǝ nǝrmama me nǝha tuhǝpwǝh nǝrkwiien kɪmiaha ia nǝgkiariien me sǝvǝnraha.

⁹ Iakani iamɪnhi irǝ tɪ nǝri nǝ mǝ iǝrmama nǝha Kristo, Kumwesǝn ramarǝ pam ia nɪpɛwɪn mukuǝr irǝ. ¹⁰ Nǝnǝ tɪ nǝri nǝ mǝ kɪmiaha hiǝmǝuvehe mho kuatia kɪmiaha mɪn nɪmɪruien sǝkɪmiaha ruvǝukuǝr raka nari riti mwi riwǝn tihamǝkeikei mhǝtui. Kristo in rasori ia nǝnɪmwɪn me pam sǝmǝme kamhǝuvehi nasoriien mɪne nǝrɪmǝnuien. ¹¹ Nǝnǝ tɪ nǝri nǝ mǝ hiǝmǝuvehe mho kuatia kɪmiaha mɪn, kuvǝuvehi raka ninhum m kɪmiaha. Mǝtǝ nuvehiiien ninhum nǝha iakani rɪpkǝ mhǝ sǝ nǝha iǝrmama riti ro ia rǝgɪn, rekǝm. Iakani nuvehiiien ninhum nǝha Kristo rɪno mǝrai raka noien ǝrǝha sǝvǝi nɪpɛwɪramiaha.

¹² Nǝnǝ nǝpɪn kɪno pǝptaes ia kɪmiaha, kɪnɪmwi kɪmiaha kɪmiaha mɪn. Ia pǝptaes nǝha kɪmǝuvehi utǝ mwi kɪmiaha hiǝtui mwi ia nemhǝien kɪmiaha mɪn, tɪ nǝri nǝ mǝ hiǝmahatǝtǝ ia nɪskaiien sǝvǝi Kumwesǝn. Ia nɪskaiien nǝha in rɪno Kristo rǝtui mwi ia nemhǝien sǝvǝnhi.

Ia nei kamarkuau i Kumwesǝn rɪfi nari ia

nərmama me səvənhi

¹³ Kimiaha nərmama riṓko mhə kimiaha nəkur Isrel kəpwəh nuvehien ninhum m kimiaha ia niṓwramiaha, fwe kupwən rəmwhen mə hiəuvamhə raka ti nəri nə mə hiənamo noien ərəha me, mətə Kumwesən ruvei pehe niṓiruien vi m kimiaha nəṓin riṓo Kristo rətui mwi ia nemhəien səvənhi. In riṓenouenou raka noien ərəha me pam səkitaha. ¹⁴ Nəkukuə nəha rərəha ia kitaha kimərai pen noien ərəha me irə səkitaha mə tukərpwṓn pehe m kitaha, Kumwesən ruvəuvehi raka raka nəkukuə nəha irau nəḡkiariien me səvəi Loa səməme kamhərkwi kitaha, məruṓi tərini pen ia nei kamarkuauṓ. Ro pen in riṓi nari ia kitaha. ¹⁵ Ia nei kamarkuauṓ Kumwesən rətəfi niṓkaiien səvəi nəniṓmwiṓ me səməme kamhəuvehi nəsorien mine nəriṓmənuien. Rəmwhen mə rərihi tərini rəḡinraha, miri irapw irəha ia nəmri nərmama, mahatən pen mə ruvəuvehi irapw niṓkaiien səvənraha ia naruaḡənien.

¹⁶ Ro pen tiḡəpwəh nəsenien iərmama riti rəkiri noien səkimiaha ia niṓkaren səvəi nəfe hiamani uə hiaməniṓmwi, uə ia niṓkaren səvəi nəfe hiamo ia nəṓin ikinan me, uə nəṓin səvəi məkwə vi, uə sapat. ¹⁷ Narimnari me nəha həmwhen a ia nəniṓmwi nari sə rəpwəh ihi nier peheien, mətə niṓwran in Kristo. ¹⁸ Nərmama nepwṓn nəha irəha kamhəni mə nərmama tuhaməkeikei mhəuvehi irapw nətəriḡien səvənraha nənə mhəfwaki m nagelo me. Irəha kamhəni nəḡkiariien nəha mamhərer ia nəməkrəhaien me səvənraha səməme hənətoni. Kimiaha tiḡəpwəh nukurirəien irəha kamo hiarfai

2:13: Efes 2:1,4-5 **2:14:** Efes 2:14-16, 1Pit 2:24 **2:15:** Kol 1:13 **2:16:** Rom 14:1-12 **2:17:** Hip 8:5, 10:1

ia nāfe nari hiamaiu tukwe. Nərmama me naha kamhəfiəutə ia nirəha ti nəri nīpwran riwən, mamhəni nāfe ruku pen ti nətərigien atukw səvənraha. ¹⁹ Irəha həpkəkwtəmhiri əknekīn mhə Kristo, mətə in rəmwhen ia kənkəpwə iərmama. Kitaha səmwhen ia nīpwrai iərmama naha kwənəkwas me həkwi tərini kwopun nīkəkrin me rīrīpīn ikīn. Nəpīn Kristo raməkwməni kitaha nənə kitaha pam səuverə ia nuverəien sə ruku pen ti Kumwesən.

²⁰ Kīmiaha hiəuvamhə raka kīmiaha Kristo. Hiənaraka raka raka ia nənīmwin me i irəha nukune noien me səvəi tīprənə i. Mə ro iamīnhi irə rəfo kīmiaha hiamarə ihi rəmwhen kīmiaha nərmama me səvəi tīprənə? Rəfo kīmiaha hiaməsiai natuakəmien me i kamhəni iamīnhi irə mə, ²¹ “Tikəpwəh nuvehien, məpwəh nənī əghanien, məpwəh nīrapiien”? ²² Natuakəmien me naha kamhəni nəveginien mīne narimnari me hiani uə hiəuvehi nənə triwən mwī. Kamhesi pen nətərigien mīne nahatənien səvəi iərmama. ²³ Nīpərhienien, rosi nərmama me nəpwīn kamhətə mə natuakəmien me naha ho nukurənien i ti nəri nə mə ikamesi pen maməmwur mə tikəfwaki skai m Kumwesən, mauvehi irapw nətərigien səim, nīpwram raməmisə i. Mətə natuakəmien me naha ko həpkasitu mhə mhəsisəg noien ərəha səvəi nīpwrataha.

3

Nərmama me səvəi Iesu Kristo tuhaməkeikei mharkahu ia nīmīruien vi

¹ Ti nəri nə mə Kumwesən rino kimiaha hiətui mwi ia nemhəien kimiaha Kristo, ro pen təkwtəkwuni nəha tihaməkeikei mhətui narimnari me fwe irənhə ia kwopun nəha Iesu raməkure ikin ia nikare Kumwesən mwatuk.

² Nətərigien səkimiaha traməkeikei məmak ia narimnari me fwe irənhə, mətə trəpwəh nəmakien ia narimnari me ia təkure tīprənə i. ³ Iakani iamīnhi irə ti nəri nə mə kimiaha hiəuvamhə raka, nimiruien səkimiaha kinərkwafə pen ia Kumwesən kimiaha Kristo. ⁴ Nimiruien pərhien səkītaha in nə Kristo. Nənə nəpīn Kristo trirərig pehe mwi, Kumwesən tro nərmama pam hətoni Kristo mine kitaha, nənə irəha tuhətoni namasanien mine niskaiien səvənhi.

⁵ Ro pen kimiaha tihaməkeikei mhəpwəh anan noien ərəha səvəi tīprənə me i: nīpran mine nəрман kamhəiri əpnəpen irəha me, irəha kamho noien ərəha sə ro a naurisien, mamhokeikei pik irəha me ti noien ərəha, nətərigien səvənraha rukuər ia noien ərəha, rerīnraha ramakres (noien nəha rəmwhen mə kamhəfwaki pen m nənīmwi nari me). ⁶ Noien me nəha kamho niemaha raməpi Kumwesən. Tripko mhə tui in ruvehe mərpwīn noien ərəha me səvəi nərmama me nəha səməme kamhərui nəkwān. ⁷ Fwe kupwən kimiaha mwi hiamarə mamho noien ərəha me nəha nəpīn noien ərəha me nəha kamhərimənu ia kimiaha. ⁸ Mətə təkwtəkwuni nəha tihaməkeikei mharaka pam ia nīrəha: niemaha, nətəpaharien, nəmwəkīien iərmama, nīniien nikare iəramə, mine

3:1: Kol 2:12, Mak 12:36, 16:19, Efes 1:20 **3:2:** Mat 6:33 **3:3:** Rom 6:2, 2Kor 5:14 **3:4:** Fil 1:21, 1Kor 15:43, 1Jon 3:2 **3:8:** Efes 4:25-31, 5:4

nægkiariien æmkemik sə raku pen ia tərhuī iærəmā.
⁹ Tihəpwəh neikuəien ia kīmiaha me, ti nəri nə
 mə hiənəpwəh raka nimiruien akuas səkīmiaha
 mine noien ərəha me səvənhi, ¹⁰ nənə mharkahu ia
 nimiruien vi. Nimiruien vi nəha in nəha iərmama
 vi sə Kumwesən rino, mamərməvi ia nətərigien
 səvənhi mə truvehe məmwhen irə. ¹¹ Ti nəri nə
 mə kitaha səuvəuvehe mhəno nərmama vi me ia
 kitaha nəri auər a mə ik iəmā Isrel uə rīpko mhə ik
 iəmā Isrel, kuvehi ninhum mik uə kīpkuvehi mhə
 ninhum mik, ikukurən amasan nari uə ipkukurən
 amasan mhə nari, ik slef uə rīpko mhə ik slef, mətə
 Kristo in narimnari me pam, mamarə ia reritaha
 pam.

¹² Kīmiaha nərmama Kumwesən rīmərfi
 kīmiaha. Kīmiaha nərmama ikinan mine
 nərmama keikei me səvənhi. Ro iamīnhi irə
 kīmiaha tihaməkeikei mhəuvehi pen nimiruien vi
 nəha səkīmiaha rəmwhen ia karkahu səkīmiaha.
 Kīmiaha tihaməkeikei mhəpi ti nərmama, mho
 ramasan mīnraha, mhəuvehi irapw nətərigien
 səkīmiaha, mhəpkəfiətə mhə ia kīmiaha, mho
 nətərigien səkīmiaha rəpwəmwis, ¹³ mhəpwəh
 nəseniien niemaha rəpi akwauakw kīmiaha.
 Trini mīnuə iərmama riti ro rərəha ia kīmiaha riti
 ramasan mə hienouenou i. Iərimənu səkīmiaha
 rinenouenou noien ərəha me səkīmiaha. Ro pen
 kīmiaha mwī tihaməkeikei mhenouenou noien
 ərəha me səkīmiaha me. ¹⁴ Nənə irənhə ia noien
 me pam nəha, tiharkahu nokeikeiien sə ravi tərini
 amasan narimnari me pam həuvehe mho kuatia.

3:9: Efes 4:22,25 **3:10:** Efes 4:24 **3:11:** Kal 3:28 **3:12:**
 1Tes 2:9, Efes 4:2,32 **3:13:** Efes 4:32, 5:2 **3:14:** Rom 13:8-10,
 1Kor 13:13, Efes 4:3

¹⁵ Nənə pwəh nəməriniuen səvəi Kristo rərīmənu ia rerimīaha, tī nəri nə mə Kumwesən rīnəkwein ia kīmīaha mə tihəuvehe mhousəsimwīn rəmwhen nīpwrai iərmama kuatia mharə ia nəməriniuen nəha. Nənə ia nəpīn me kīmīaha tihaməkeikei mhəni tanak m Kumwesən. ¹⁶ Pwəh nəgkiariien səvəi Kristo ramarə pəpwīə ia rerimīaha, hiamahatən mamhəvəhag m kīmīaha me ia nukurəniēn me pam. Tihani nīpu me ia nəkukuə nəha Ol Sam, mīne nīpu me səvəi nəfwakīēn, mīne nīpu me səməme kamhəuku pen tī Nənimwīn Ikīnan, mhəgnəgīni Kumwesən mə rerimīaha ragīēn tukwe. ¹⁷ Narimnari me pam səməme hiamō, mīne nəgkiariien me pam səməme hiaməni, tihamo mamhəni ia nəghi Iesu lərīmənu səkitaha, mamhəni tanak m Tata Kumwesən tukwe.

Nəvəhagīēn revən tī nakalasia me ia nimwə me səvənraha

¹⁸ Kīmīaha nīpran me, tihaməkeikei mhəsiai nərman me səkīmīaha. In nə noien atukwatukw nīpran me kamhahatətə ia lərīmənu tuho.

¹⁹ Kīmīaha nərman me, tihaməkeikei mhokeikei nīpran me səkīmīaha, mhəpwəh nomətəiēn irəha.

²⁰ Kīmīaha nəkwərhakwərha me, tihaməkeikei mho nəkwai tata mīne mama me səkīmīaha ia narimnari me pam, tī nəri nə mə noien i ramo lərīmənu səkitaha rerīn ramagīēn.

²¹ Kīmīaha tata me, tihəpwəh noien nəkwərhakwərha me səkīmīaha niemaha rəpi irəha, kamo nətərigīēn səvənraha rīmwei.

3:15: Fil 4:7, 1Kor 12:13,27, Efes 4:4 **3:16:** Efes 5:19 **3:17:** 1Kor 10:31, Efes 5:20 **3:18:** Efes 5:22 **3:19:** Efes 5:25 **3:20:** Efes 6:1 **3:21:** Efes 6:4

²² Kimiaha slef me, tihaməkeikei mho nəkwai nəmə asori me səkimiaha ia tɪprənə i ia narimnari me pam, mətə tihəpwəh noien nəpɪn kamhətoni a kimiaha rəmwhen ia nərmama səməme kamhəmwur mə tuho nərmama rerɪnraha ragien, mətə tiho ia rerɪmiaha pam mhehekɪr lərimənu səkitaha. ²³ Nəfe nəghɪn hiamo, tiho ia rerɪmiaha pam rəmwhen hiamo tukwini nari m lərimənu səkitaha, rɪpko mhə hiamo tukwini nari m nərmama. ²⁴ Kimiaha hiəukurən mə lərimənu səkitaha truvei pehe nərəkuien atukwatukw səvəi narimnari me səməme hiamo. Nərəkuien nəha in rɪnəmri karen raka mə səvəi nərmama me səvənhi. lərimənu pərhiən sə hiamo tukwini nari min in nə Kristo. ²⁵ Mətə iərmama sə ramo rərəha truvehi atukwatukw mwɪ nərəkuien səvəi noien ərəha səvənhi, tɪ nəri nə mə Kumwesən ramo raməmnəmwhen m nərmama me pam.

4

¹ Kimiaha nəmə asori me, tihaməkeikei mho ratukwatukw m slef me səkimiaha pwəh rəmnəmwhen a. Tiho iamɪnhi irə tɪ nəri nə mə hiəukurən mə kimiaha mwɪ hiamarə tegɪn iəmə asori riti. Iəmə asori nəha in fwe ia neiai.

Nəvəhagien me nepwɪn mwɪ

² Kimiaha tihaməkeikei mhəfwaki m Kumwesən ia nəpɪn me. Nəpɪn tihəfwaki irə, tihəpwəh napriien, mamhəni tanak m Kumwesən. ³ Tihaməfwaki mwɪ tukumaha mə Kumwesən trəsevər ia təpɪnhə tukumaha pwəh iahəni irapw nəvisaiuen ia Kristo sə fwe kupwən ramərkwafə.

Nəgkiariien i in i iakinani irapw nənə kuvehi puvnimwə iou ia kalapus tukwe. ⁴ Tihəfwaki mə takini irapw nəgkiariien nəha trəmher amasan rəmwhen a mə takaməkeikei mo iamihhi irə. ⁵ Kimiaha tihaməkeikei mho nari ia nukurənien ia nəmri nərmama iruə me mhəpwəh nətə wauien ia nəp̄in riti səkimiaha ti nuvi peheien irəha. ⁶ Pwəh nəgkiariien səkimiaha ramasan ia nəp̄in me məsien rəmwhen ia nəveḡinien kuvei pen sol irə, nənə tihaməkeikei mhəukurən amasan mə tihəfo irə mhəripwen nəgkiariien səvənraha kuatia kuatia.

Nəgkiariien sampam

⁷ Tikikas trəvisau irapw pam noien me səiou ia kwopun i m kimiaha. In piəvtaha keikei riti sə kimaha iahəukurən nətigiteien irə, ramasitu mamō tukwini nari m Iərimənu səkitaha kimaha min. ⁸ Takərhi pehe in tukumiaha ti noien i, mə in tro kimiaha hiəregi ramasan, mini irapw tukumiaha mə iahaməfarə irə. ⁹ In truvehe irau Onesimas, piəvtaha keikei i kimaha iahəukurən nətigiteien irə, in iərmama riti səkimiaha. Irau trouəvisau narimnari me pam ia kwopun i m kimiaha.

¹⁰ Aristakas in ramarə ia kalapus kimrau min, in rani ramasan tukumiaha. Mak, piəvi Panapas sə karen, in mwi rani ramasan tukumiaha. Mak nəha, kimaha iahəuvəni pehe raka tukumiaha i mə kimiaha tihaməkeikei mhəsevər ia rerimiahā tukwe tr̄ini minuə ruvehe tukumiaha. ¹¹ Nənə

4:4: Efes 6:20 **4:5:** Efes 5:15-16, 1Tes 4:11-12 **4:6:** Efes 4:29, 1Pit 3:15 **4:7:** Efes 6:21 **4:8:** Efes 6:22 **4:9:** Flm 10-12 **4:10:** Wok Me 19:29, 12:12, Wok Me 13:13, Flm 24

Josua Jastas in mwi rani ramasan tukumiaha. Ia kwənəkʷus me səvəi nəkur Isrel səməme kamhəni nɪpərhiēnien ia Iesu, iəmənmirəhar i irəhar əpa kamharowok kimaha mɪnraha ia nɪkaren səvəi nɪtətə sə Kumwesən ramərimənu irə, nənə irəhar harnasitu pɪk ia nirak. ¹² Epafras, iərmama riti səkimiaha sə ramo tukwini nari m Iesu Kristo, in mwi rani ramasan tukumiaha. Ia nəpɪn me rerɪn ramrhi kimiaha ia nəfwakiiēn me səvənhɪ, maməres Kumwesən mə kimiaha tihərer əknəkɪn mhəmruə nənə mhəukurən amasan narimnari me pam səməme Kumwesən rokeikei. ¹³ Iou iakəsəni mə nɪpərhiēnien in ramo wok skai tɪ nasituiēn ia kimiaha, mɪne nəkur Laotisia, mɪne nəkur Hierapolis. ¹⁴ Luk, tokta keikei səkitaha, mɪne Temas, irau krauni ramasan tukumiaha. ¹⁵ Tihəni tukwini ramasan səiou revən tɪ piəvtaha me fwe Laotisia, mɪne prən nəha Nimfa, mɪne nakalasia me səməme kamhousəsɪmwɪn irəha me ia nəkwai nɪmwə səvənhɪ.

¹⁶ Nəpɪn tihəvsini raka nəkukuə i səiou, nənə tihaməkeikei mhərhi pen i revən tɪ nəkur Laotisia mə irəha tuhəvsini mwi m nakalasia me fwe ikɪn. Ia noien a mwi nəha, kimiaha tihaməkeikei mhəvsini mwi nəkukuə səvəi nəkur Laotisia.

¹⁷ Nənə tihaməkeikei mhəni pen tɪ Akipas mə in traməkeikei mo pam wok sə Iərimənu səkitaha riməuvei pen min.

¹⁸ Iou Pol iakauvehi nəri kamrai nari irə mamrai a ia rəgɪk nəgkiariēn səvəi nɪniēn ramasan m kimiaha. Tihəpwəh nenouenouien jen me i kɪnərihi iou irə. Pwəh namasanien tramarə tukumiaha.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416